

寶祐仙溪志

仙溪志卷三

衣冠盛事

仙溪地方百里科第蟬聯簪纓鼎盛甲於他邑自昔有一門兩公相五里三待制之遙今自宰執侍從臺諫至於家世科第大書特書以侈茲邑之盛事若橋全墩流之識必有出而當之者繼此當不一書

封王

陳洪進

宰相

葉顥

侍從臺諫

陳氏升次諫文閣待制

朱紱諫議大夫給事中寶文閣待制

傅淇御史直龍圖閣

許積監察御史

陳讜兵部侍郎敷文閣待制

王回監察御史

許敦仁工部侍郎御史中丞

林一飛戶部侍郎

余崇龜兵部侍郎給事中

葉大有刑部尚書寶謨閣待制

父子侍從

傅楫

中書舍人龍圖閣待制

子誼夫 兵部侍郎

四代侍從

蔡襄

禮部侍郎

孫伸

徽猷閣待制

曾孫洸

戶部尚書徽猷閣待制

元孫

寶謨閣直學士

一門監司郡守

傅謙受

夔府漕使

汶

江西提舉

淇

浙東西提刑

誠

淮西漕使兼提刑提舉

楫 亳州

諒友 和州

誼夫 東平府開德府

詒度 邵武軍

鞏 郴州

誠 光州

大聲 循州

葉確 河北提舉

元璘 廣東提舉

元汴 廣東漕使提刑

崇 浙東提舉

元澣 桂陽軍

圭 容州

槃 新州

大有 溫州

蔡襄 福建漕使

馱 福建提舉

洸 寧國府

陳謙 浙西提刑

諒 象州

蘇欽 利路漕使

兄弟同時監司

傅汶 弟淇

汶江西提舉淇浙西提刑二路相隣
母夫人年九十更迭迎侍人以為榮

馱 江東廣東漕使廣東提
舉湖南浙東提刑

樞 夔路漕使京
西淮西提舉

伸 徐州

豐 南恩州

洸 知雷新豐辰四州

兄弟同時郡守

陳謹 弟諒謹知貴州諒知潯州潯貴相望子姪更迭省問謹諾相聞二州之人榮之

父子相繼監司

林豫 子師說並為江西轉運又並為廣東漕運又並浙江提刑

兄弟同拜刺史

陳文顯通州 弟文灝衡州 文顥舒州 文頊庾州

廷試第二人

蔡佃

第四人

王邁

第五人

丘獻

省試第一人

葉大有

一門登進士第

蔡氏二十三人

山溪王

襄

高襄弟

衮

準

京

卞

脩

佃襄孫

佃佃弟

棟

樞襄曾孫

頃樞孫

數言頓子

仍卞子

衍京姪孫

伸佃弟佃兄

戡伸孫

諒樞孫

說襄五世孫

雋戡從弟

廉襄裔孫

儀甫襄五世孫

儀國襄來孫

傅氏二十五人

楫

諒楫子

巖楫孫

誼夫楫子

權楫姪

求楫姪

希龍楫孫

佇巖姪

知柔希龍姪

牧巖孫

淇佇子

誠牧子

誠牧子

丙楫孫

公稜楫孫

益淇孫

大聲誠姪

燧公稜子

學古丙子

熈淇孫

一聲求姪

夢澄知柔從姪

雷龍

虎臣

登炳

許氏十二人

程

積程弟

巽積子

賁積子

異積子

章積從子

堯夫異子

堯臣異子

振異子

知新堯夫孫

亞璟異孫

興裔知新子

葉氏十一人

賓

傳賓子

確賓姪孫

牧賓姪孫

阜賓姪孫

顯寶臣孫

立功確曾孫

立志立功弟

叔僑寶臣姪孫

槃顯姪孫

大有顯曾姪孫

余氏七人

象

夏

授夏姪

元一象從姪孫

崇龜 元一弟

日華 崇龜子 君節 日華從弟

陳氏五人

次升

拱之 次升姪 湯 次升曾孫

立伯 次升曾姪孫

塤伯 立伯弟

六代登進士第

許積

子 巽 賁 異

孫 堯 夫 振

曾孫 亞 環

元孫 知新

來孫 興 裔

四代登進士第

蔡準

子京卞

孫脩仍

曾孫衍

三代登進士第

陳驥

子豐

孫謙

父子登進士第

葉賓

子傳

陳浩

子瑄

陳公言

子大卞

傅楫

子諒
諒夫

傅佇

子淇

傅牧

子誠
誠夫

傅丙

子學吉

傅公稜

子燧

蔡頤

子敷言

陳覺民

子崇輔隣

陳開

子畢

余崇龜

子日華

許巽

子彥為

王鑑

子邁

兄弟登進士第

蔡襄

弟高

蔡佃

弟佃伸

丘子雲

弟子諒

許程

弟楨

許堯夫

弟振

蔡珪

弟珏

陳驥

弟駢駒

傅誠

弟誠

林宋卿

弟宋臣
宋弼

葉立功

弟立志

林從周

弟灝

兄弟同年登進士第

吳乘

弟秉

林宋臣

弟宋弼

蔡京

弟卞

余元一

弟崇龜

仙釋

盛唐之際邑加仙遊之名晚唐以來地有佛國之號宜其神奇之跡靈異之人並生錯出於此歟

何氏臨川人字名莫詳漢元狩中兄弟九人自臨汝來經行雞子
城奕於巖畔煉丹於湖上丹成乘九鯉魚上昇今有丹竈藥槽
水簾虬跡及巨人武尚存厥父府君跡而尋之見九子已仙去
因隱此山今立水仙廟在焉留仙乃其遊憩之山風亭乃其結
風之所舊傳九仙結風為亭羣處其上故名湖有仙湖即九鯉湖嶺曰仙嶺水曰仙水
山曰九仙縣曰仙遊皆本諸此

羽士梅洞霄括蒼人能出神入夢未南渡前嘗言錢塘有天子氣
既而言驗夔漕傳謙受攜與偕來自括蒼乘桴遇風波濤洶湧

眾舟俱覆梅師步斗顧瞻對岸有北方正神之幟者若有物扶之以濟險福神道觀始鑄鍾既成叩之無聲梅揮劍擊之鍾始大震為福神開山

九座禪師名智廣姓陳縣西留坡人唐元和二年生不茹葷於日

月中行有十二影隨身常持鉄鉢并一白犬隨行或聞面前有引道呵喝之聲空中或降乳香中宵或現燈燭鄉人異之開成中至鄂州參鹽官禪師鹽官發問師答曰不東不西是佛菩提不上不下真佛不假鹽官曰佛法省要盡在汝矣初卜山富洋

次入南山庵咸通六年始卜庵於九座山之東端坐石龕中有
巨蟒側睨師端坐無怖色蟒乃去又有異人作禮獻雙木履師
受之後其觀者競齧其屑而歸以為祥異遂於巖西立院院西
有龍潭師每浴水必煖若有司其事者一日至則水冷俄聞山
中有鞭箠號泣之聲自後不復浴矣由是四方傾慕禱祈雨澤
叩禍福事必驗王氏入閩師曰騎馬來騎馬去自光啟丙午據
閩終保大丙午見閩中實錄有留從効者師遇之甚厚嘗有識曰功
下田力交連井底坐二十年從効果據泉州如其言後滅其宅

靈驗多如此世謂龍樹王化身光啟二年八月十一日示寂年八十乾寧中謚正覺禪師宋元祐六年加封慈應崇寧中勅賜無塵塔額隆興元年以本路軍縣遇旱禱雨屢有靈應加封普濟

瑞香禪名恩師姓王泉州人唐元和元年建富洋院道場太和六年示寂得舍利無數建塔於院東會昌間官司欲毀之雷電大作蛇虎遶伏遂不敢毀宋天禧間忽從塔頂放紅毫光隱而復現凡六度每有瑞香自塔中出因號焉本縣祈雨屢有感應嘉

定十一年勅賜靈惠禪師

僧清忠嘗取經西川得金水寫經以歸泛海為海神取去再往得銀水寫經復為盜劫又往川人疑其為販經者欲殺之自斷右手以誓血成血乳川人異之得墨字經以歸皆臘紙楷書復授以雕番人二雕孩兒二雕鳳二雕雞二曰以此擁護必能達遠五代蜀天漢三年勅賜紫衣歸建道場於龍華寺之東偏閩貞明五年勅補充律大德宋初勅賜院額曰普惠號曰宏治大師仁宗神宗兩朝有御書詩賜之

廣濟禪師名志忠姓陳本縣人與直寂沈禪師雅相愛遊處俱

唐長慶中經行莆田龜山院北遇六眸神龜躡四小龜行俯仰

其首如作禮者三遂結庵於此遇後皆跌坐而逝勅賜廣濟禪師

祖熙禪師名道和姓潘縣西人棄儒就釋微廟時曾對御升座賜

紫太中大夫左階儒祿食邑一千五百戶實封五百戶特賜今

號住真州長蘆寺開堂日呂洞賓作回秀才應供祖熙覺之遣

使者同其行止回秀才直至江頭橫劍渡水而去照師不待侍

者回報先陞座云四海雲遊呂洞賓長蘆江上見全身山僧擬

欲留仙旆却展神通過別津侍者回眾僧云已道了有語錄行於世

南林庵主了明姓陳生而有異光出家為僧至京師相國寺與異僧懷素遇親承演說法要大悟辭亂歸隱於金剛山三十餘年戒行完淨處山絕巔建庵人疑其山高泉涸師禮拜告天亭午雷鳴擊石泉湧而出至今不竭山居四十七年如律結夏至末年獨否從者問其故師曰余行不久矣一日登座告其徒曰若論此事無形無相無今無古天上天下誰人覺悟若問蹤由雪峯

不打南泉鼓會麼。咄。遠看山有色。近聽水無聲。端坐示寂後。呂大資惠卿誌其塔。

僧名遇住高田院。常讀大藏經。忽一日。有一人立於經案前曰。請和尚歸去。僧荅曰。汝是何人。曰。陰司使者。僧書偈曰。三年過了。又三年。要讀元文滿五千。功德圓時珍重去。毋煩使者上高田。僧省澄姓阮。本縣人。禪行高潔。乾德中。賜號真覺。住泉州招慶。從學者千計。嘗夜至雲堂。有僧方熟寐。口吐華光。澄潛為作禮。翌日。僧謂澄曰。夜來夢白晝觀音作禮。此何祥也。澄愕然。

卓道者名彌真縣南人舊為鋸匠入山遇異人授以二桃食其一而留其一異人問之何不盡食荅曰留以遺母自是不茹葷性自靈悟施頌及水病者飲之即愈後遂祝髮結庵於鳴峯山晚年跌坐而化今真身猶存里人禱雨皆獲徵應號鳴峯巖

僧號僧伽紹興間來憇靈陂院前小橋之上伺飯鐘則入僧徒厭之食後鳴鐘僧伽入赴而食已罷回至橋僧伽趺坐而化僧徒以香花法器迎入本寺眾力昇擡不動靈峯寺僧聞之率眾來迎二夫舁去甚易塑像而崇奉焉雨暘祈禱無不應驗

僧自殊住席麻般若庵曾參大慧禪師有大贊真墨云真實既無
~~毀~~讚了無功却許殊禪者於中一線通庵在文筆峯下

僧文義依安里人姓陳乾寧中參雪峯王化師作偈呈曰覲面相
呈這個漢只守虛空勿涯岸不似世間採寶人拋却真珠守泥
彈雪峯云如人到人家敲門主人公出來却問這箇莫便是主
人公麼師乃叉手近前雪峯拈起拄杖開平初還山一日其徒
問和尚誦什麼經師云沒字底經又以偈答之我所嘗念經未
嘗有所念念念還無念聲聲不間斷作麼遣時光所圖非功德

示寂得舍利子一千二百餘粒以琉璃盛之迎歸丈室為靈鑑
院開山

僧文偃本縣人修行堅苦日誦金剛經不輟口所居丈室不燭自
明湯瓶水常滿若有神供

祠廟

祭法云法施其民則祀之以死勤事則祀之能禦大災捍大患則
祀之閩俗機鬼故邑多叢祠惟袁侯以死捍寇於法得祀餘或以
神仙顯或以巫術著皆民俗所崇敬者載在祀典所當紀錄其不

在祀典者不書

城隍廟縣西二百步舊有廟淳祐癸卯知縣蔡次傳重建

仙水靈惠廟縣東北二十里九仙山下焉

唐景雲間有清源縣仙水廟記今亡

舊傳

何氏兄弟來憇此山其後乘九鯉仙去厥父府君跡而尋之因

遺香爐銅杯鐵鞭於溪中盤石之上雖暴漲不沒里人神之即

其地立廟中塑府君像環列九仙皆跨鯉後以禱雨屢應紹興

間賜廟額靈惠乾道三年封嘉應侯寶慶二年加封惠利

天聖間知

縣孫諤始至凡境內祠宇悉火之適歲大旱聞有仙水廟因禱雨輒應廟得不毀且增飾之紹興十一年知縣謝天民重建

神主科名尤靈詔歲興福漳泉士大夫齋戒詣祠下丐夢不絕
陳謹夢記載王邁丙子春丐夢祠壇夜夢登閣上如絲畫設幕
帟分為四龕王據其首俄有僧偕一童子至謂王曰左右當坐
第四位王問僧為誰童子曰僑如尊者次年唱第果居第四將
有秋名少遇丙子春偕昆季丐靈夢一小童捧牌示之題四字
曰解是各有及揭榜以有秋名預薦顧幼強自城闌持來請禱
將旦夢有童子授之蘭又道士從外入謂顧曰何郎回禮日方
有信息覺而莫喻時其子孺履尚齟齬庚午春莆陽士子迎奉
何侯入城寓顧君所君之旁是秋父子俱預薦所謂回禮者此
也次年同赴蘭省獨其子登第此蘭之應李夢龍解試祈夢得
荷葉聯昆季之語太學補魁王夢洪前得夢有名有名東南
第一人之句是皆已然之
明驗未易悉數之

靈顯祠在縣東北來蘇里

舊名何仙祠

九鯉之上面揖爐峯俯瞰平

湖丹崖翠壁環列左右雲影波光輝映上下彷彿蓬萊閬苑非
人間之風韻也稽之載籍神姓何諱未詳始居廬江徙豫章娶
張氏生子男九人女四人時漢淮南王安好文學與數術之士
神在江淮間與王友善九子亦從之遊後九子師大羅學辟穀
法遂自九江寓居於閩之子山今福州經高蓋山今永福縣復過莆
今有太平社行祠因覓山川之秀遂過雞子城山東北之湖上嘗對奕
於巖畔煉丹於湖側其父府君亦辭淮南渡江而右與其母小
君自閩之莆跡尋其子九子丹成欲引父俱仙以母不從而止

湖有九鯉竊嘗其丹皆化為龍九子乘以上昇父遂隱其山四女歸于張楊范信氏以鐵鞭銅玃香爐行程歷遺所隱山中未幾飛於山南溪之盤石上雖洪流推激不去後又棲於溪北林木上烏鵲翔鳴以萬計時人相顧駭異後記其經行之地目其山曰九仙山湖曰九鯉湖有何巖何嶺仙水之名宋乾道二年旱甚縣官禱之立應遂建祠并構樓閣中像其父府君旁列孔子郡之士子有志於功名者先期齋沐謁祠丐靈顯晦皆決於夢其應如響淳熙丁未歲旱郡守朱端學禱之時有龍見上其

山溪三

十五

事於朝勅賜靈顯有勅額記仍捐郡帑二十萬為新其祠

靈惠袁侯廟在縣西之上余侯名章任武翼郎殿前司第四正將
紹興甲子何白旗賊犯境有詔發禁旅三千以尅復命密州觀
祭使張淵統之侯隸麾下與張都統會合期日勦滅至九座山
聞賊兵在前遂提孤軍先往與賊遇於磨石山下力戰死焉邑
人哀之為立祠紹興中賜廟額

興福廟在縣西一里神姓林名義縣下頓人生為巫醫歿而有靈
紹興間汀寇猖獗侯發陰兵拒賊現身人皆見之兇徒遂潰乾

道間賜廟額嘉泰辛酉封威祐侯尋累封彰應通靈孚順侯淳

祐間封孚祐昭德公

父封靈惠英濟侯母葉氏封靈貺淑靖夫人妻黃氏封靈惠協順夫人

顯祐廟在縣東蘇山茶園之舊址號官庄廟紹興元年賜廟額乾

道中封神惠侯寶祐三年加封廣濟

興教廟在縣南街古傳鹽場之地土乾道間賜廟額

慈感廟在縣西一里神姓陳氏本汾陽人生為女巫歿而人祠之

婦人妊娠者必禱焉神功尤驗端平乙未賜廟額嘉熙戊戌封靈應夫人尋加封仁惠顯淑廣濟夫人寶祐間封靈惠懿德妃

三妃廟在縣東北二百步 一順濟廟本湄州林氏女為巫能知
人禍福歿而人祠之航海者有禱必應宣和間賜廟額累封靈
惠顯衛助順英烈妃宋封嘉應慈濟協正善慶妃沿海郡縣皆
立祠焉 一昭惠廟本興化縣有女巫自尤溪來善禁呪術

歿為立祠淳熙七年賜廟額紹興二年封順應夫人 一慈感

廟即縣西廟神也三神靈跡各異惟此邑合而祠之有巫自言
神降欲合三廟為一邑人信之多捐金樂施殿宇之盛為諸廟

冠 俗名三宮

東嶽行祠在福神道院

南臺惠利嘉澤二侯廟在縣東一里舊傳神本福州南臺神其廟基乃舊巡檢衙昔有巡檢福州人奉其香火因立行祠於廨內後遷寨於繫蓼而神祠如舊

昭靈顯祐真君行祠在縣南五里正廟在莆田江上烽火燉按郡志昭

靈廟始福州福清張真人祠熙寧十年以旱禱致雨護餉有功封保禧真人紹興三年賜昭靈廟額尋加封妙應普祐靈濟又按比事云趙昇初師事張道陵隱居鳴鶴仙嘗乘鉄舸至莆田江口今舟痕尚存於石因立祠累封顯祐真君趙本學於張流俗相傳謂之張趙一謂姓趙未里人傳真君化現身知孰是俗稱正一天師妙觀大帝非也

山溪三

鑿井得泉雖遇旱歲不涸灌田萬畝民利之號其泉曰聖泉井
曰龍井因立祠焉歲旱禱井必雨鄭必六記

明山靈濟廟在縣東二十里宋建炎間有楊氏兄弟居於山側長
名泰次名梓歿而有靈祈禱輒應里人畏而愛之紹定間賜廟
額累封威惠昭應廣祐侯顯惠孚應普佑侯

靜應廟在縣東三十里舊名詹林祠祈禱感應俗呼詹林翁瀉祐
初賜廟額

昌山靈應廟在縣東三十里人敬信呼曰大仙瀉祐初賜廟額尋

封昭祐侯

靈輝廟在縣西之古瀨乃魁巖山神水旱盜賊祈禱必應葉正簡公請於朝賜廟額累封昭應順利忠嘉顯佑侯妻封忠祐靈惠夫人

英濟侯姓陳名伯高為靈輝之佐曩歲山寇迫境力捍禦之葉大監棠請於朝封助忠將軍淳祐辛亥加封英濟侯

蕭宮冲應廟在縣東南五十里姓蕭氏兄弟勅賜廟額尋封孚顯孚應孚惠侯

威祐廟在縣東南五十里風亭市端平三年賜廟廟額

順濟行祠一在風亭市西里人崇奉甚謹廟貌甚壯神父林愿母

王氏廟號祐德寶祐元年王教授里請於朝父封積慶侯母封

顯慶夫人妃之正廟在溫州而父在風亭市母封爵自風亭

詳見明著錄

威惠靈著王廟二在風亭市之南北按漳浦威惠廟集云陳政仕

唐副諸衛上將武后朝戍閩遂家於溫陵之北曰風亭靈著王

乃其子也今風亭二廟舊傳乃其故居

慈濟冲應真人行宮一在縣東慈應堂一在縣西元台門外

靈濟廟在縣北三里寶祐四年賜廟額

祠堂

古者鄉先生歿而祭於社以其功德之可稱也先賢祠於僧寺者多惟縣家所立有關世教者特書之餘悉不著

蔡忠惠公祠在縣學尊道堂東偏知縣陳肇之立

陳郡王祠堂在連江里後覽鄉有德星堂三字蔡君謨書

葉正簡公祠在縣學尊道堂西偏知縣葉文炳立

張招討副使公祠在邑東街

舊址邑治北

王御史祠在保福院法堂西偏知縣陳致一立鄒道鄉墨蹟名公
挽章刻於祠側知縣樊泰之為記

張都統祠在水陸院西廡知縣陳致一立紹興中平山寇有功邑
人德之故為立祠權尉方畢為記

林萍齋先生祠在龍華寺東廡寺內法華庵乃萍齋讀書之地故
立祠於此

冢墓

董子之墳過者下馬生而敬其人死而護其兆此賢人君子所以

為世勸也不可不書

唐散騎常侍墓在縣南五里鄭墓頭

蔡忠惠公祖墓在縣南四十里赤湖蕉坑後奉勅葬公及夫人於
風亭之蔡山唐妙應禪師識云赤湖蕉坑口風亭草市頭蓋指
此也

葉正簡丞相墓在縣西二十里烏石大旗山

王御史墓在縣東北二里保福院後

勅昭德公墓在縣北三里大飛山下春月闔邑士民皆祭掃焉

勅靈著王父墓在縣南四十里赤湖陳墓頭

林萍齋墓在縣東五里靈陂亭西

張招討副使墓在縣北二里龍堀犬眠山

雲林乃墓庵碑立庵之左

傳贈義墓在邑西上賢巷三官堂前

傳贈朝奉大夫滋墓在縣西五里塗坑小翹足山

張葆光處士墓在縣東五里靈陂山院西

傳贈金紫大夫佇墓在縣南十里白石西峯山

傳龍圖閣學士淇墓在縣南三十里依安里九峯山下窰夾

傅朝奉大夫大聲墓在縣南二十里慈孝里東溪山

張八行墓在縣北二里保福院前

碑在墓西側

賜承事郎陳訥齋墓在縣西北十五里埔前山

王臞軒在縣南三十五里珠嶺

勅惠澤廟

在惠州博羅縣

死節鄭知縣墓在縣南十五里香山

義塚在縣西北一里彌陀庵之側知縣呂祖平創後知縣翁永年

重修

仙溪志卷四

唐及五代人物

攷才於異代為難非難於攷而難於傳也蓋非有卓然可紀之事
不得其傳焉按進士題名載陳乘陳光乂二人事業無可攷者郡
志人物僅鄭良士元弼父子及陳郊三人信乎難於傳也清源志
載董士安陳洪進陳郁皆以仙遊人書之時縣尚隸清源也因備
載之以見邑之人物其所由來遠矣

鄭良士

舊名昌士避唐諱改今名

字君夢博學善屬文唐廣明龍紀中以五七

山溪四

字詩入於貢籍策試不中昭宗景福二年獻詩五百篇授國子

四門博士累遷康恩二州刺史兼御史中丞天復元年棄官歸

隱於白巖故墅今拱橋西與泉州刺史王延彬秘書陳乘正字徐夔

輩更相唱和乾化五年始赴閩王審知辟命初署館驛巡官尋

辟建州判官公性沉厚寡言審知以其長者遷威武軍節度掌

書記尋轉左散騎常侍兼御史大夫長興一年卒年七十五王

御史倫銘其墓有白巖文集十卷詩集十卷中壘集五卷藏於

家字元弼

元弼文華雋爽起家試校書郎遷禮部員外郎通文二年閩王昶
遣公貢方物於晉致書執政辭旨不遜晉祖怒以公屬吏獄具
引辨公俯伏昶夷貊之長不知事君之禮得其善言言不足為
喜得其惡言不足為怒陛下方敦示大信懷柔四方望回日月
之照霽雷霆之威臣將命無狀願伏斧鑕以贖昶罪晉祖奇之
賜帛遣歸延義襲位授右諫議大夫加禮部尚書判三司公性
強好面折人嘗謂大理卿虞戒盈曰吾家弟兒女也惟吾自奮
爾會當伏蒲之質居言輔之地當掃不平事為君開豁耳目也

會朱文進篡奪公抗辭不屈黜歸田里將奔建州附王延政為
文進所殺弟元恭秘書省校書郎元索至別駕元龜太平興國
呂蒙正榜登進士第官至司馬元禮官至推官元振官至員外
郎元瑜官至秘書郎元忠官至正字八子俱博讀墳典文采華
艷仍工九成宮書時人號曰鄭家八虎又歌曰賈彪三虎兮往
代荀爽八龍兮典載名不朽兮人不逢人兮名空在滎陽八虎
今成群見之避之走紛紛見藝文九國志
獨實錄及郡志

陳郊家貧力學通五經王仁達功高居宿衛言事未嘗避忌閔王

猜惡之竟誣以謀叛族誅郊掌仁達牋記收郊屬吏使者籍沒

仁達家惟得郊歌詩文藁閩王嘉伏不誅擢為宣徽使

見十國紀年及

郡志

董思安與留從効王忠順合謀殺黃紹頗請王繼勳為勅史累遷

軍帥思安身長九尺勇毅一時號大蟲南唐兵攻建州思安與

王忠順領兵赴難戰數不利或說二人以去就計思安曰吾輩

世為王氏臣今危而叛去天下其有容我者乎眾感其言無有

叛者城陷忠順力戰死之思安全其眾奔歸泉州南唐師征南

州李宥義又與從効統兵以為應援嗣主聞而嘉之以為漳州
刺史思安辭以父名章乃改為南州時留從願為副使其後耽
殺思安自領州事

見清源志

陳洪進字濟川

今屬亭市馬母嶺之西有故宅墓

頗讀詩書習兵法因隸兵籍以

功補副兵馬使送黃紹頗首於建州王延政大悅以為本兵馬
步行軍都校未幾遣歸南唐以留從効為清源軍節度使洪進
為統軍使與副使張漢思同領兵柄從効卒洪進執其子紹鑑
送南唐推張漢思留從自為副使明年洪進為清源軍節度泉

南等州觀察使宋太祖削平四方洪進大懼遣牙將魏仁濟間道奉表納款太祖遣通事舍人王班齎詔撫諭乾德二年制改清源軍為平海軍授洪進節度泉漳等州觀察使檢校太傅賜號推誠順化功臣江南平吳越王入朝洪進不自安遣其子文顥入貢太祖召入觀未至太祖升遐復歸鎮太宗即位加檢校太師明年入朝上言以漳泉二郡歸於有司乞授近地別鎮詔納納以洪進為武寧節度使同平章事賜鐵券并白金萬兩市宅封杞國公改岐國卒年七十二贈中書令謚忠順累贈南康

山溪四

四

郡王洪進在泉十七年在闕十年子文顯字仲遠泉州馬步軍
都軍使右軍押衙乾德初朝命授平海軍節度副使累加檢校
太保歸朝授通判團練使知泉州未幾代還闕次文顯為漳州
刺史凡七年入貢至京師自陳願留俟父入覲洪進歸朝授功
州刺史換康州歷知同耀徐濮四州終衡州刺史文顯終滁州
刺史文顯終歸州刺史

見清源志

陳郁少篤學博覽群書手不廢卷仕王延義為諫議大夫奉朝請
未嘗闕預機務每歸沐在室即焚香誦經故免於禍卒年八十

一見清
源志

楊在堯其先自華陰入閩居仙遊登唐天祐二年進士第終右補
闕有文集子崇鼎為陳洪進子婿歸朝授明州推官終大理寺

丞知惠州
見清源志

李庭芝上世唐神堯皇帝七世孫尚芬居於福建天寶之難勅於
福建路召募宗室尚芬率子弟戰勝以功為奉天定難功臣漢
乾祐間遷居於仙遊之汾陽宋初收錄前代帝王子孫授庭芝
泉州助教

留居道鄂國恭公從効之猶子持麾下兵從効無嗣以居道為後
○開寶間出判莆田鎮因愛赤湖山水之勝遂卜居焉後累贈尚書
右僕射家藏建隆褒諭御筆甚詳

宋人物

莆故秀民未嘗肯出仕仙遊人物自唐以來姓名可攷董一二宋
世異人輩出甲於他邑慶厯之諫臣元祐之君子乾道之相業其
人物之懿懿真足為國家麟鳳皆邑之奇產也餘以事業自見者代
不乏人先正流風未遠衰而次之如立直木於九達之達後進有

所望而趨邑之人物其有不興起者乎

蔡襄字君謨年十八試進士為開封第一人天聖八年登進士甲
科為漳州軍事判官景祐三授^年西京留守推官適待制知開開
封范仲淹上百官圖指宰相呂夷簡差除不均罷知饒州余靖
上疏論救尹洙請與同貶歐陽修移書責高若訥不言仲淹之
非辜公作四賢一不肖詩都人爭傳之契丹使至密市以還歸
書於燕山驛壁康定元年改著作佐郎充館閣校勘慶厯三年
歐陽脩余靖王素俱除諫官公以詩和之三人以詩薦於上尋

亦除諫官時謂四諫乞用韓琦范仲淹罷呂夷簡是時天下無
事上銳意求治言事之臣無日不進見而公補益為尤多四年
八月直史館同修起居注十月以親老出知福州遂為福建都
轉運使復古五塘以溉民田又奏減閩人丁口稅之半皇祐三
年判三司度支勾院時御史唐介以直言忤旨貶春州別駕廷
臣無敢言公獨論其忠人皆危之而上意旋悟唐介得改英州
遂復召用四年遷起居舍人知制誥兼判流內銓皇慶五年九
月模寫真宗奉神述聖製畢御筆賜字君模至和元年七月御

史呂景初吳中復馬遵坐論梁丞相罷臺職公封還詞頭不草
制其後屢有除授非常者皆封還之而上遇公益厚尋遷龍圖
閣學士知開府_封三年以樞密直學士知泉州徙知福州至則則
禮賢勸學篇進士周希孟為本州教授以經術傳授學者延見
處士陳烈尊以師禮陳襄鄭穆以學行著皆折節下之又作五
戒_補以諭民自大義渡至漳泉夾道植松七百里閩人刻碑頌德
三年三月再知泉州五年召拜翰林學士權三司使八年八月
遷給事中拜三司使治平二年以端明殿學士知杭州徙南京

留守未行卒年五十六公為文清邁粹美有莆陽居士集三十卷尤工於畫頗自惜不妄為人書故其殘章斷簡人珍藏之仁宗尤愛稱之御製元舅隴西王碑詔公書之其後命學士撰溫成皇后碑文又勅公書則辭不肯書曰此待詔職也高宗嘗評公書法為本朝諸臣之冠歐陽脩以為當世獨步行書第一小楷第二草書第三公累官至禮部侍郎翰林學士王珪與十餘人殞言公賢特贈吏部侍郎瀋熙三年謚忠惠公歐陽脩銘其墓弟高景祐元年登進士第子勾旬是

伸字伸道端明公季子旻之子也致和五年登進士第歷太學正

太學博士知濰州北海縣事京東學事主管文字徐楚饒直四
州通判知滁徐德安和四州浙東安撫司參謀官公少年倜儻
有大志建炎紹興間盜賊蜂起公雖以名門取科第獨喜從事
於戎馬間嘗曰國步多艱中原未復豈能以書生餘技取爵祿
耶時戚方已歸降而復叛朝廷方議遣帥公單騎直至麾下說
以禍福方素聞公威望且伏其文士無所畏避如此即為感動
乃出就招一州賴以全活累官至中大夫贈特進兄佃崇寧元

山溪四

年進士第二人官至朝奉郎直龍圖閣佾大觀三年登進士第
官至中大夫徽猷閣待制子洸官至戶部尚書徽猷閣學士孫
戡善屬文有定齋類藁四十卷易解四卷正觀諫錄二卷本朝
名臣懿範十卷典故類說十五卷雞肋編十八卷忠惠年譜一
卷白樂天年譜一卷官至寶謨閣學士

傳字永翁端明公之孫旬之子也端明薨朝廷錄其子孫以公守
將作監簿時公方二歲太令人劉氏提攜訓誘至於知書而乃
心獨善自負自六經子史左氏春秋六朝五史之書傳記小說

陰陽律呂之學皆務貫穿或謂公材氣秀發盡與舉子俱前決
勝公曰科舉事吾豈薄而少之顧脩學好古實事求是者與等
爾矧吾夙孤可復一日去親戚哉卒不遊場屋而學行逾力歷
通判南京留守司公事時年甫四十三官朝奉上章乞致仕即
日理裝奉親以歸有城南詩集二十卷吟窗雜錄二十卷雜文
及時政議十卷官至朝請郎累贈金紫光祿大夫子櫛樞

櫛元名犯欽廟諱改今名

字一強明之曾孫傳之長子大觀三年登進士

第歷官朝奉郎直秘閣知泉州泉乃端明舊治公下車布政寬

山溪四

不弛嚴不殘民吏宜之謂有祖風自來泉祖母太夫人劉氏白
首康寧父金紫公以綠髮休官泉距莆才二舍安車往來奉養
珍厚人皆榮之金紫公及公之喪泉人來致奠酌相屬於路其
治行感人悠久若是官至朝奉大夫贈朝議大夫

樞字子應傳之仲子政和五年登進士第剛介廉清有祖風烈厯
官西京路提舉學事司主管文字御史常安民在黨籍人多疏
之公方為學屬日造其門尊之以師禮提舉湖南路學事殿中
侍御史張所授教潭州學公未知何如人因所白事乃曰時

事如此度今可任國事者為誰所以劉公安世對公瞿然曰自
崇觀以來禁錮元祐之學文字言語稍涉疑似必寘之法子為
教官乃敢申公論首稱黨人無懼色真可人也歲薦學官即以
所充選公年四十有五慨然笑曰先公掛冠之年吾已過之時
方多事其可無功冒寵乎即丐致仕榜所居堂曰世隱宣和末
大興燕雲之師本兵者口口引公為謀議官公毅然不從
以書止之其畧曰天下無事錄不識兵革一旦為國生
事驅民萬死一生之地傷害和氣莫此為甚且自河而北實朝

山溪四

十

廷根本根本搖非久安之道他日國家多事自此始矣其剛明遠識不肯詭隨始終如一累官朝散郎守尚書職方員外郎致仕贈朝請大夫張九成銘其墓子頤孫師言敷言皆登第

楸字子堅傳之季子以父任尉會昌贛賊犯境楸奮曰此吾職也

領所部及土兵數千人與賊相持然皆倉卒烏合未戰輒潰暮夜力不勝遂遇害公少好學問時出秀句若竹靜深留月花多不辨香曙分林影外春盡雨聲中人所膾炙又於字畫能世其家公歿王事贈承事郎官其子頤後以子贈朝請大夫

陳次升字當時熙寧六年登進士第調虔州司理參軍和州防禦
推官尋改宣德郎知密州安丘縣時州從事攝政告以繫囚頗
眾當斥大獄屋公曰子不教我期於無刑乃教我廣獄耶未幾
從事到縣而獄空於是嘆服秩滿注英州僉判未上召除監察
御史訪察江湖元祐更化公乃還朝供職時司馬公當軸如劉
摯蘇轍范純仁王巖叟等並言路公挺直不減諸公而和平溫
雅過之繼而諸賢相攻公力丐外補提點淮東刑獄尋除兵部
員外郎再除刑部員外郎紹聖二年再除監察御史諫造龍舟

幸金明池事上嘉納焉閱月除殿中侍御史勸上收威福之柄
仍奏臺諫官當出聖選若出執政豈能免天下之議又令近臣
舉薦並須召對視其人才去取出於聖斷時章惇蔡卞用事京
為內相姦險濟首議編元祐章疏摺撫臣僚公授勅榜有開自
新之路一切不問之語乞行寢罷惇卞以公乃神廟親擢持節
在外必生怨望特除言官欲其出力排元祐舊人以為已助嘗
令太府卿林顏言於公曰昨日湖外來皆已之力苟相助何患
不得美官公言某知守官而已不知其他公為卿監乃為宰執

傳風旨耶顏愧而去惇下益啣公屢於上前媒孽其短欲出公
摠河北漕計上曰一轉運之才何難得陳某敢言不當去左右
可除左諫公受命登封方造膝上遽曰久不聞卿讜論公再
乞避言路上曰朕親擢卿復何辭公益感厲自奮上方親政惇
下欲誣宣仁皇后有廢立之意公因奏事畢輒前曰臣聞宣仁
保佑聖躬終始無間若以姦臣疵毀輒有議論不惟有虧聖孝
且失人心上竦然曰卿何從得公曰臣職許風聞苟有所聞當
以忠告陛下不當詰其所從來時呂升卿為廣南按察公奏曰

陛下初欲保全元祐臣僚今乃欲殺之何耶上曰無之公曰呂升卿為廣南按察豈非殺之耶升卿乃惠卿之弟元祐中負罪家居其人資性慘刻喜求人過今將使指於元祐臣僚遷調之地理無全者於是罷升卿按察職待制劉安世聞之曰陳當時有功於元祐人居多會一日奏大理觀望多致濫獄上問大臣曰陳某觀望者何卞謂奏觀望陛下以激怒爾上默然又以嘗劾章惇奏入不報一日陞對上謂公曰章惇文字勿令絕了公唯唯而退公再對上語及惇公又力言之於是惇等抵巇求罅

無所不至而掖廷愈欲公去二年五月貶全州酒稅徽宗即位
除知廣德軍不旬日除侍御史公言章惇自登揆政任私害公
奉使山陵措置乖繆於是惇乞罷政公又率同僚陳師錫陳瓘
等言惇包藏陰謀助尊私吏擅興軍旅妄詆宗廟惇遂謫雷州
先是蔡卞謫太平州京出守江甯公言卞備位政府肆行姦謀
人目為笑面夜叉尋移卞池州又言京姦謀凶險陰害良善尋
罷京職名公又言京親昵閹官漏泄宮禁原情定辟寔即投荒
京由是提舉洞霄宮建中靖國元年擢司大諫八月出使契丹

山溪四

崇寧元年還國公出使之十一月曾布進紹述之說於是上決
意用京使還之日得旨給事中尋以寶文閣待制出知潁昌府
姦言日至降充集賢殿修撰左司諫吳材正言王能甫尚肆醜
詆以公元祐姦臣擅欲紛更先帝約束落集賢殿修撰知萊州
續降官濠州居住又移臨江軍又除名建昌居住復編管循州
乃蘇轍元貶所邦人合為祠焉四年京等籍元祐黨人姓氏立
碑於文德殿之東上因天變慨然悔悟特加英斷命毀刻名應
元祐^元黨人以次序復復公朝奉大夫知漳州京言公與朱

紱皆元祐奸朋詆誣宗廟今任牧守豈能奉行法令體朝廷紹述之意差提舉亳州明道宮大觀四年蔡京罷相復集賢殿修撰政和八年六月復寶文閣待制累官朝散大夫宣和元年上章告老續上遺表終於私第訃聞特贈太中大夫年七十六有讜論二十卷姪孫拱之廣州戶曹湯撫州通判塤伯昭州法曹立伯泉州察推並登進士第

朱朱紱字君貺治平四年登進士甲科元祐二年以李常孫覺陸佃曾肇列薦除王宮大小學教授尋外除紹聖初章惇當國首唱

異議寘元祐諸公於死地一時趨附之徒爭言功利公被旨召對首陳正心誠意知人安民之說上意嘉納除諸王宮侍講再遷翊善元符元年除都官員外郎時正言鄒浩以論元符后不當立竄新州貧甚不能就道公率親舊出金贖行其事上聞悉以所饋遺者赴臺鞠治獄具第輕重以竊贖金特厚追一官勒停徽宗登極以藩邸舊臣除直秘閣召赴闕累遷右諫議大夫給事中時范純禮劉安世呂希仁張舜民屏黜於外悉為論列有旨後苑作使奏審山園陵支過錢帛更不供報戶部公謂戶部

主財賦出入國家用度豈宜有不預聞山園陵支錢陳師錫自
潁移廬自廬移蘇吳伯舉自蘇移滑公謂監司郡守於民最親
宜謹擇久任以安百姓不宜數易馬涓送吏部與合入差遣公
謂馬涓任臺官兼進士第一人無他過犯送部非朝廷崇重臺
官之體蔡王府獄事興有司捕逮株連甚眾江公望論列頗切
守外郡公封還制書言公望杜塞閒隙以全陛下兄弟之義
今若以言罪之雖篤信不惑之士亦不敢以直道自任況非其
人耶論駁再三以是忤大臣意出知壽州久之上思其忠崇寧

元年進寶文閣待^制真定府路安撫使二年中丞石豫力肆詆誣落職提舉杭州洞霄宮入元祐黨籍再降指揮朱紱係姦黨人姓名適同乞改名諤從之五年星文變異上悟黨錮之非凡隸籍者悉蒙湔洗起知福州蔡京復相公遂罷大觀元年依舊落職提舉杭州洞霄宮二年以疾終於家官至左朝請大夫初公在後省凡四月論駁無虛日政府遣人諭意於公曰上眷待如此不日當在此地公不為動時紹述說興趙挺之唱於前蔡京和於後京既相天下事滋紛紛公以書責之曰彼為紹述

之議者豈毫髮為朝廷計特借是固寵位復恩讐耳自公秉政中外屬望今乃持之益堅行之益峻是知有私恩不知有國恩知肆情得意取快於一時不知基禍異日之為可憂也京得書大怒抵於地始力謀所以去公者臺官諭意始扶公細故并以合黨王回締交鄒浩罪之蓋是時聖眷未衰若不鈎致黨籍他日必復召用其措意深矣其後陸佃王珪葉祖洽韓維等於大觀二年凡四出籍通一百五十二人公獨不數中益信京之忌公深也建炎間始復舊職贈少保子宗

宗字成德以父任補官歷司農丞駕部司門倉部吏部員外郎時
銓漕法廢事皆留滯公視職之始有士人在任被賞轉官俾任
滿赴部自陳吏扼以須會問原任之處遂訴於公公索案一覽
叱吏立開鈔一時該賞五六人併令具鈔人服其果決累除司
農鴻臚太府卿徽宗尊寵潛藩之舊併錄其子如何志同溫萬
石傳誼夫之儔皆超進大官待制亦舊學之臣公不自言亦無
為公言者太師蔡京同州里持國柄逾二紀公未嘗造其門靖
康初政近臣薦公才堪治劇淵聖召見欲用公為開封尹而公

奏事觸宰相命遂止高宗即位除不附己者多被譴斥公亦罷
免建炎三年提舉南京鴻慶宮紹興元年召為大理少卿建安
盜起上飭制置使發兵捕誅師屢無功除直秘閣福建路轉運
使且趣入對公曰遇民窮困無聊弄陛下兵將吏養寇弗除誅
歛益急將盡驅齊民以為盜陛下第追還制置使付臣綏集之
可無戰而平也陳便宜十字上嘉納之制置司方奏募兵檄取
錢米數十萬公遺書責之曰擁兵彌年州縣轉餉費百萬而誅
責不已民在瘼矣吾不能復為樂石公自為之會朝廷更遣他

將而盜平卒如其策官至右朝散大夫累贈中散大夫子元一
飛

元飛字彥實仕官三十年不營一金產所得奉給即買書籍每部
各三本分遺三子為書藏之所居之地有穹石堂林萍齋諸公
留題其上有歸樂堂朱文公為之記官至福州通守公丞同安
時文公為簿因通族系子孫滾廣東帳管涓漑俱遊其門其家
藏文公往復墨蹟尚存族孫泳分居紫陽

寘待制紱之從子正議大夫紱之子元豐二年登進士第元符三

年為秘書省秘書丞以待制公入元祐姦黨併遭罷免政和元年
起公知南雄州辭不赴尋責於家其子遷居風亭市

王回字景深少事親孝登熙寧六年進士第累任為江陵府松滋
縣令邑苦淫祠以人祭鬼謂之採生行旅不敢道境公蹤跡痛

繩以法民用寧生監開封府陳留縣酒提點刑獄羅適以公不

自表襮率尹顧臨諸公共薦之改秩知濠州鹿邑縣歲餘邑人

萬餘人朝

壯其治行於州及部使者乞留延閣其各廷聞其名召為宗正
簿充睦親廣親宅講書時鄒浩為諫官以言事竄南方平時故

。舊往往不敢顧公慨然為之治裝慰其母心仍上書力辨上怒之遂罷其職及御史請具獄嘗出餞者公卒從吏訊有司執奏削籍遂徒步出都城其子持橐糧問以家事公曰苟獲宥及以寬政辛矣家事唯若等是力也哲宗即位復官加武騎尉監泉州稅未幾召還舊職公往返莆泉見者以手加額無不稱賢既至擢為監察御史未幾以疾終年五十二知與不知咸為嗟惻侍徒臺諫表其行聞於朝乞官其子渙老太廟齋郎紹興中令陳致一立祠於保福院

傅楫字元通少試廣文館第一不第而歸聞孫覺陳襄有學行摳
衣從之襄門人許安世江衍之流皆以文藝冠多士襄不之取
獨曰傅元通金石人也以其女妻之治平四年登進士第調楊
州司戶再調福州福清丞帥曾鞏負才倨視天下士獨與公鈞
禮厯太原府大谷縣令謁帥曾布文驚曰是福清傅丞為吾兄
所知者耶率部使者交薦改秩知吉州龍泉縣時孫覺為御史
中丞謂公曰朝廷欲用公幸少留除書且下矣公曰仕所以樂
居中者免外臺督責之辱今頽首權門與外臺奚擇經出國門

道除太學博士凡四十年足未嘗及宰相執政之門秩滿即日
詣曹^叡布知樞密院與其副林希共薦之除太常博士神宗時有詔
復議祠北郊議者多持兩可公獨援經據古損其車服儀衛賞
賚之類頗得其中後卒如公議施行紹聖三年徽宗由遂寧邸
就資善堂紹大臣擇德行老成人為傳宰相以公名聞除詣郡
王位說書徽宗封端王就除諸王府記室參軍為侍講朔善會
諫臣鄒浩以言事譴公厚贖其行坐是免所居官纔兩月徽宗
即位問公安在除直秘閣進尚書司封員外郎擢監察御史權

殿中侍御史論內侍都知劉 特寵專恣不報移國子司業遷起居郎召試中書舍人徽宗面稱訓詞有西漢風是時曾布當國以兄弟與公有汲引恩冀其助已公歸然守正凡朝廷命令兩可欲進退人材有未當如救王古范純禮之類皆人所難言者必極論之不合者因是中傷公公不恤也建中靖國秋見時事更張竊歎曰禍其始此乎不去楚人將鉗我於市聞者莫不甚其言公笑曰後當以吾言為驗遂求補外以龍圖閣待制知亳州卒有文集三寸五卷累以諸子恩贈少師汪龍溪藻狀其

行米希題其墓曰宋傅元通之墓子諒友誼夫謙受從子權希
龍

諒友字冲益元祐九年登進士第初注蘇州吳縣主簿政和六年
除尚書祠部員外郎改膳部明年知和州未赴而卒公天資_恬
淡自六經太史氏百家諸子浮屠黃老之書無所不讀歌詩賦
頌表牋傳序箴銘記志之文甚工有冰廳文集藏於家孫內翰
覲銘其墓曰觀公之文蔚若武庫魁琦瑋麗九鼎十鼓聽公之
詩隱若大呂震越洋鐙歌周頌魯胡不畀之天子之所常_制坦

然常楊燕許詩誦穆如奚斯吉甫百不一譏貴恨入土天造茫茫孰知其故荆溪之陽名原牕牕吾豈草木而與俱腐遺書爛然照映千古

誼夫元符三年登進士第官至朝請郎尚書兵部侍郎贈中奉大夫

謙受字冲亨以父蔭補承務郎自少刻苦六經子史下至陰陽道釋之書無不涉獵而尤長於詩天性友愛雅量寬厚重違近樂假貸於人倅新安鎮靜不饒公事之餘觴咏而已除夔州路轉

運判官卒

權元祐間太學學錄時太皇太后高家府求師有旨令有學選德

行文藝兼著者祭酒司業以公名應命至高氏皆尊之曰傅夫

子六年登進士第唱名日傳宣許特恩太后賜御厨食十金錢

十萬金錢一千絹百匹及香茶等高大龍圖贈行詩有上林供

玉宴聖母賜金錢之句子共三薦奏名文詞秀拔有東坡和陶

詩解

希龍字廷允與從兄權求同登第時人號為傅氏三龍知漳浦縣

日開河達縣學之前至今學中有傳公河碑時二蔡當國不肯附之崇寧間詔具元符上書姓名黨籍公與焉從子知柔

知柔字德潛宣和三年以上舍登進士第授循州判官有盜曹少龍迫境居民驚遁公教軍士造百枝弩及置砲石之屬寇至登城發弩被傷者百餘人寇潰一城賴以全活部使者聞於上改秩知漳州龍巖縣虔寇為擾聞公威名避去後解印歸寇復至縣為灰燼調泉州僉判海寇林元仲猖獗禁帥夢得素知公檄往焉出幟示寇招撫元仲請降帥聞於朝轉朝請即調福州僉

判卒有香風遺文一集

林豫字順之熙寧九年登進士第元豐初淮南賊嘯聚公為連水軍使多設耳目悉就擒捕遷京東排岸使二蘇兄弟皆推敬之

元祐初蘇軾薦公曰自為布衣已著奇節及其從事所至有聲

其在連水屏除^羣盜尤著方略試之盤錯之^地也必顯利器遂除

通利軍^{見東坡大全集}蘇轍又薦公吏幹聰敏長於應變所至可紀更

加試用宜有可觀^{見樂城文}當時名公以其言為當初軾以作詩譏

切下御史獄公適賜對神宗問所薦為誰公曰蘇軾問何以識

之曰臣經由杭州因會客識之又曰是日所談何事公稽首曰
臣之所言無非忠孝詞氣從容畧不避孝公輩之側目識者題
之元祐八年五月御史董敦逸攻蘇轍黃慶基攻蘇軾慶基疏
曰近薦林豫自京東排岸司遂差知通利軍奔競之士超走其
門呂大防奏敦逸等所言三省皆以為非敦逸慶基皆罷紹聖
元年轍貶惠州軾貶雷州章惇恨公賤轍詞有怒髮衝冠壯心
比石之句左遷公雲騎尉換授內藏副使紹聖四年敵人撤霸
橋深人除公河北沿邊安撫使公乃乘間興尋敵人無能為也

後因陞對泰陵褒獎再三元符三年除鄜廷路兵馬知鄜州黃
河北決移守冀州盡心之弱幼穉廩以官粟募少壯者築堤厚
與之傭民爭應役賴以金活除定州兵馬知廣信軍奏論河之
利病崇寧二年以六宅使除真定府兵馬知邢州力議鈔面錢
陝西銅錢之弊及朝廷下本路折糴公格不行數忤時宰暮年
罷去上終思之大觀四年知邵武軍凡歷七郡悉有遺愛邢臺
邵武之民各畫像立祠公平日不苟合所知者皆正人端士坐
二蘇所薦入元祐黨籍平居未嘗廢書自易老子莊子陰符道

^經經佛氏心經皆有注釋又著雜說十卷雜文十卷目爲筆峯草
錄玉龍圖悅銘其墓子師舜師益師說師臯

師舜靖康中以守職不肯避狄全家死敵官至中大夫

師益靖康初以閣門宣贊舍人提舉京城四壁守禦司後軍統制

金人犯京城楊龜山先生立講筵奏公曉達軍政器識可用使
之專督訓練必有績效可觀授京畿第一正將悉力捍禦敵既
去公急為防秋計敵再渡河諸將皆遁公孤軍奮勇勤王至封丘
與敵前鋒迎戰敵大敗明日全軍大至公謂其副曰彼取我寡

山溪四

吾當以死報國遂力戰歿焉後有題其墓曰虎踞龍盤經幾春
靖康孤節映蒼旻至今凜凜有生氣愧死當年膜拜人姪日選
游陳復齋之門登嘉定七年進士第官至福州通判

師說字箕仲少為知名進士屢當補官遜於從兄師文弟師龍故
入仕最晚試銓為第一調嚴州司士寨卒驕甚郡請公攝理官
以經畫之悍卒帖服樞密李公時為守禦使就辟公改秩知江
州德化縣繼倖新定敵犯二浙新定民大恐公躍騎出城遇敵
騎譁曰吾受命主帥以城降者賞公叱之曰吾聞國家命不聞

賊命擒斬於市以是新定之民嬰城死守累遷朝奉郎通判滁州未行除兩浙福建淮東制置司參謀官拜尚書員外郎丞相趙公力薦于朝將漕廣東韓京以武將立功知循州頗驕慢公乃上其姦狀後數歲里人陳士宏以檄見京京曰監司直須還此老第於我少恩爾後除兩浙東路提刑獄山陰圻內貴人率占田取竹木石辦墟墾為民害公一繩之以法以忤權貴力請祠祿而歸陳西軒昭度撰公墓誌纔成而屬疾迺命其子約林艾軒更定其文艾軒以書報之曰林郎中大率如富鄭公徑截

其他表裏只是一個人光朝每對人常如此說非率爾之辭
師臯通直郎歿於王事朝廷特官其一子

葉賓景德三年登進士第宋初仙遊登第自公始知南安縣民牛
為盜截舌以聞縣公陽叱去陰之果有告私屠牛者公謂告者
曰截牛舌汝也訊之伏罪官至都官員外郎南劍州通判從子
權確

確元豐八年登進士第時鄉人蔡京當國公與朱大卿宗皆其裏

姻每議論間知其必敗未嘗一詣其門後欲以蘇州守與公令人約一見然後報行公翛然掛冠後京果敗終河北提舉曾孫志立

立志字仲愿淳熙十二年登進士第調泉州南安縣尉縣有重辟牒公驗視一屍無首人皆難之公焚香告天夜設榻屍側夢一神人指示曰死者之首投於溪北殺之者已遁於潮之小江明發急謂謂溪北尋之果獲移文至小江捕之見其人磨刃江側捕者詰之曰汝非南安殺人者乎其人驚怖刃墮地於是就擒之

山溪四

侯

鞠即服人稱其神改扶牢上饒有廉聲有見山集十卷官至惠州通判子袞奉議郎通判泉州

許懋字敏修慶厯六年登進士第將漕兩浙衢民私釀繫獄久不決公至出之因感泣競詣佛寺飯僧祝壽時甘露降於州人謂德政所感作甘露頌

余象父積守職方員外郎致仕公擢慶厯六年進士第厯官光祿寺丞首奏王安石議論詭辨辨名實眩耀雖為一時之文人終為異時之巨蠹上怒安石亦憾之因與左右傾公出通判宜州到

任上疏又奏安石小人終累大事若果亟用必至有紛更之失
一時出安石之門者皆惡之得蔡襄余靖力辨獲免上亦知公
之直就加秘書丞尋除太常博士英宗即位召見特授屯田員
外郎謂近臣曰余某敢言不憚左右朕常畏之卿等宜自謹勿
使之有言也名動朝廷儉黨側目出通判宣州至州與民無擾
州民至登門檢鼓院乞公領州事上以問司馬光呂公著對曰
余象乃陛下之汲黯內則面折廷爭外則卧治社稷臣也即授
都官員外郎知宣州神宗即位就授職方員外郎尋除屯田郎

中通判南劍州十一月除禮部尚書郎中造朝入對薦胡安定
門人錢藻孫覺錢公輔范純仁遂求致仕公耽書好為詩有遣
興一集論語集解一集中庸大義三十五章呂公著薦其書於
朝上欲大用而公卒范仁狀其行從子授

授熙寧六年登進士第初調福州侯官縣尉捕盜改秩李內翰清

臣作告詞曰勞其大小之異而材志之所存俱可嘉也爾奮勵格

賊是亦忠勇為不孤所職矣遷秩書省以示勸焉見其水文集遷校

書郎博學能文多所著述官至京西提舉

陳陳覺民字達野熙寧九年登進士第元祐聞詔舉賢良方正林
希^錢以公名聞時方紛更神考法度人莫敢言公力陳役法則
乞復顧役邊事則乞弗棄地其言剴切時議者欲罪公并坐舉
者賴言者獲免知建州^建陽縣以救荒得民心家畫像生祠之歷
太常寺奉禮郎除宗正丞將大用公以母老乞補外知漳州改
知建州政治有聲擢充福建路轉運判官移知福州故樞密安
公惇昔與公為同舍生情好甚篤元符間任諫議大夫中執
法曾無片言扳引及謫守長沙乃欲以公代已令史持文書以

為信意規厚利公笑而遣之小史歸間言惇由是不樂及居政
府言者承惇意謂公當却近臣舉自代坐是罷監東嶽廟尋起
知泉州時有同建言欲摧六郡酷朝廷下其奏公陳五不可且
移書約他郡使同之事遂寢尋遷本路提點刑獄兼三路都轉
運使兼提舉河渠以大夫年九十九奉母蒞政於家人皆榮之
復知泉州以右文殿修撰知廣州所至有風力雨為鄉部使者
凡過郡邑未嘗與僚屬妄交一談人甚憚之卒官至中奉大夫
有文集若干卷制策十卷書評十卷研譜一卷陳諫議權狀其

行子宋轉登進士第磷賜上舍及第官至吏部郎中

開字發明以太學生登熙寧六年進士第調密州教授時太守蘇文忠公深器重之諸生力留更七年而後代密州儒風之盛自公始後入為太學博士召對進兩劄其一排新法其一去小人進君子言議激切時小人當國出為雄州通判尋除宗正寺丞官至朝奉大夫累贈金紫光祿大夫蔡端明襄狀其行子畢元符三年登第

張式字景則天聖五年登進士第調南劍將樂簿有銀治坐歲課

不足繫者數百人公籍其人使貧當財力相兼亡者釋之課更以羨知福州古田縣遷太常博士知開封府咸平縣呂許公罷相以許州觀察推官辟之御史中丞舉公知洺州以選知虔州三司市舶絹十餘萬非經數拒而弗市復知濠壽二州

許積景祐二年登進士第歷尚書都官郎中通判德州仁宗朝舉天下廉吏凡四十九人公預焉除監察御史未造朝而卒該致仕恩國初凡該致仕者差官未到不敢劔歟子巽曰人子不能自致功名求致仕以累亡者可乎鄉人賢之後與弟賁異及子孫

相^繼斷登第從子章

章字潛道慶厯二年登進士第厯官知達州除尚書屯田郎中公
為政能治煩劇而不問苛細所至有聲由初仕至郎位有薦者
五十二人官終朝奉郎

林宋卿字朝彥崇寧五年以舍選登進士第三山鄭俠孫女議公
婚所獲繫縵資不以為已有寒畯出京者例厚贐之搢紳咸高
其志量西歸道出通州與年交廖尚剛^書拜陳忠肅先生求教
忠肅先生徐曰頭項直公言下領悟所得為多又嘗從游楊龜

山溪四

三十

山先生故立朝行已多遵二先生之槩履改秩除睦親北宅宗
學博士召試秘書省正字與張樸見素韓駒子蒼等二十六人
為詩社公為之序引有道山詩社一集除暫權直翰林學士院
出知恭州瀘南帥司奉御筆開溪費州道南通辰沅西抵瀘戎
置一州二縣變梓二路聽其節制時邊臣多以開拓蒙賞故瀘
帥希旨興役公屢移書於瀘以止不從乃上疏反覆數千言詞
氣忠憤其畧曰溪費州檢踏切恐生夷疑惑別致生事大率役
其地不足耕得其民不足治引惹邊患貽害一方蓋蜀郡與群

蠻為隣若不杜塞其源則接武邊功者衆豈不斷喪六十州生
民之命脉乎徽宗覽^奏惻然有旨罷役帥臣褫鐔命公兼提舉
夔州潼川府路兵馬都監司公事仍知恭州二漕隨亦合奏開
陳楊龜山聞之曰觀復和卿朝彥三子學方真百鍊剛也未幾
思州納土夷官田祐恭與弟祐祥為怨家告密臺憲欲寘極刑
獻奏朝廷命公直其獄公至察註誤者釋之以事干邊防乞從
末減奏至上大喜時尚書省令覈路數十萬縑充燕山軍須漕
臺文移星火公稟漕以保障繭絲當權輕重變門至隘人心易

山溪四

搖末產下戶當為蠲削故恭民德公甚深官滿張運判深與部
使者薦公治行乞畀再任上曰是當奏罷溪州役者姑與再任
以寬朕西顧憂公恭賜民宿逋二十萬八千四百五十餘緡米
十五萬四千三百石有奇自受俸非祿令所著者一介不取始
終五襪不易也家繪生祠以奉之靖康中以煩言得旨衝替諸
公祖餞哦詩擁卷馮時詩云並馮英俊顏如甲頌德蠻獠口即
碑假使當時頭項縮了翁泉下也相嗤僞寓涪陵之韓亭歌咏
自適與吳公敏鄧公雍相唱和有涪陵集涪之士夫與以公才

學出處與黃太史相先後號公為小涪尹公和靖見之曰溪費
一奏皆自養氣中得之後薦於張公以元樞宣撫川陝辟公參
謀軍事公力辭建炎三年降德音四方人才流寓四川者眾
監司擇其才能者以聞活守王擇仁薦公學識純正氣節剛方
可備中興任使密院遂移檄於涪趣之赴闕湖北帥奏兵興機
密帥幕參謀以儒知兵以節全城無出於林宋卿者得旨差
充湖南帥司參議魏公復由相府出都督眾復推公赴督府稟
議嘗條湖北兵籌五利又有湖北事宜一集督府集議一集

魏公視師江上欲以宣撫判官辟公辭以家累寓浚欲挈東歸
魏公還朝首以公薦蒙召力求丐祠歸里終朝請大夫汪農卿
叔詹狀其行弟宋臣致皆公自訓導後同時登第

林正字明轉補唐九牧藻之七世孫本莆田澄渚人父中奉公茂宗

為葉都官招致師席遂家於仙遊石碑公以大觀四年釋褐及

第歷嚴州福州濟南府江三任教官知定海邵武二縣尋除廣南

西路提舉洞丁事改除通州婺州入為秘書丞尚書屯田員外

郎司封員外郎除廣南西路提點刑獄先是陳感作過高雷間

搔擾沿海諸郡公冒大暑親至海上招諭陳感聞公至果來出
迎盡散其脅從者數千人親押首領數十人歸於桂林及奏官
自屬官使臣以下各遷官公獨不肯受賞遂除廣南東路轉運
副使移兩浙運判除左司員外郎關陞右司郎中遷左司郎中
卒子一飛一鳴皆以父蔭補官

一飛字陞卿官至朝請郎右司員外郎權給事中

一鳴字聞卿累遷戶部左漕郎官樞密院檢詳諸司文字尋以煩
言去國時卿相正簡葉公魏國陳公大參龔公皆其姻舊公奉

山溪四

三三

母家居讀書自娛與林萍齋為忘年交談論倡酬畧無干進意後丞相梁儀公當國起公知南雄州公以母老丐祠未幾丁母憂服闋知惠州立陳文惠陳史君蘇東坡唐子西四君子祠歲飢請發常平倉廣行賑糴民賴以活罷賣口食鹽淹造鹽鈔紙官酤為民病者十數事又為文諭力學蠲荒田修坡塘種麥去喪樂禁殺牛等事居民有殺牛者方揮刃間牛掣斷繩索奔至廳下若有所訴見者驚異公命飼其牛為治屠者人以為仁化所及官滿之日惟有書數擔白金二笏而已知常德府卒官至朝

朝議大夫子澧

一柏以伯父左蔭補官左司公已奏二子有致任恩陳氏曰叔氏三子皆白衣吾不忍見遂奏從子時人高之官至朝奉郎潭州僉判弟一鶚

一鶚字雲卿紹興二十一年登進士第父歿哀經經廬墓讀大藏經三年人稱其教知建昌南豐縣頌聲載道有民謠集朝廷聞其治行擢審計院出為江州添倅官至朝通奉郎子渙知南康軍都昌縣

山溪四

三

澧字同叔為建寧職幕以廉勤自持朱文公喜其操行刮目待之
書問往復相期甚厚知崇安縣清靜不擾士民為之立祠有林
長官廟存焉

蘇欽字伯承上世自泉之德化遷居仙遊宣和六年登進士第歷
惠州錄參時盜賊充斥郡將務立威有捕至者輒置之法公白
曰人命至重盍少須之以審得實加戮未晚郡將怒曰公欲縱
賊耶且將按劾公不懼會者至果平民得免士民咸服未幾
丁朝請公憂哀毀骨立凡六年廬墓不置墨衰調福州閩清令

帥張魏公浚嘉其廉退且有治劇才易治閩縣與漕使賀參政
允中文薦之改秩知洪州新建縣時諸邑多積欠郡責盡數催
理公獨爭之曰民力告竭二稅分數及常歲足矣必欲取辦非
重施箠楚不可為民父母何忍為吾有去爾守不能屈辟廣州
機幕攝倖事會預押舶例償一資遜之同僚士夫稱其廉改江
西帥屬值贛卒叛帥憲兩司爭致之寇平論功以公居首擢守
巴州陞辭高宗宣諭之曰巴去朝廷遠甚卿則彼存撫百姓務
令鎮靜公奏曰臣當宣布朝廷寬大期於不擾上首肯之巴無

山溪四

三五

迓兵例出脚乘三千緡公悉封還以代輸賦賦邦人立碑紀其事改
知閬州自俸給外例錢互送錢皆不受尋除利路轉運使時郡
王吳璘屯重兵於興元知公出魏公之門每加敬愛公適行縣
至其州吳王厚禮迎犒留館於第宴集之外饋送錢萬緡蜀錦
數十匹鋪設供帳悉以充饋一無所受吳王愈敬之尋以疾終
公廉儉出於天性政事基於文學割俸市田分給給諸弟作富
義堂記以示子孫嘗寓福州嘉福院有鍾樓為黔卒所機鍾為之
不鳴寺僧日加禱祈不應公適至而鍾鳴如初人以為精誠所

感公為紀其事有文集六卷兩漢提要十卷子洗

洗字澄老以父蔭補官調饒之餘干尉予決精敏時令丞簿皆不
事事民謠曰知縣一桶粥縣丞一酒漉主簿一盾肉縣尉一竿
竹邑人趙忠定汝愚方魁天下喜公廉介有守折節與交改秩
堂除臨川縣時經錢缺解至捐俸代輸杖滿質錢治裝倅賓州
日張南軒先生帥桂林知運判公曾為魏公所知喜公廉介有
父風檄攝倅帥府又攝高州張公以廉吏舉公後連知雷新封
辰四州所至以廉著歸扁所居之軒曰止足邑令高之美贈以

山溪四

三六

詩曰四郡甘棠清到底一枝丹桂慶流芳至今以為美談時子權已登第長子桌孫熹皆以父蔭終縣令

權字元中父知郡攝倅賓州時南軒先生為帥嘗執經從學從伯國博公總龜鄉之巨儒又參扣馬故學問日進由太學登淳熙甲辰第調梧州推官日帥蔡戡聞公世有廉名檄攝帥屬調三山教官加意訓導士論稱之改秩就班時趙忠定姪崇伊同班言知郡公尉餘干有遺愛公蓋惠故焉感其言遂注是邑甫至官卒人莫不痛惜之有春秋解三卷子國台從潘瓜山柄受學

從國蘭登進士第

陳大可字齊賢父奉直公汝器性友悌貲產盡遜其兄居家積善
一夕飛錢滿其家奉直公與妻朱氏焚香祝曰願一子光顯門
戶錢乞減其半後季子可大果以政和二年登進士第再調泉
州工曹兼右推時龍巖解死罪強盜七人公明其無罪賴以不
死時稱神明知長樂縣大修坡唐邑人感德紀其事曰陳公齊
賢碑見長樂志後知肇慶府民不忽欺相與繪公像祠之歸日囊無
餘資惟衣衾書籍而已始仙遊縣學自宣和以來頽圯殆盡公

率族黨哀金鼎新之適知縣謝天民至相與贊成以其餘貲買田收租為後日葺治之計又於縣南溪流所會之地造仙溪橋以家貲為里人倡堅丐祠祿以畢其事至今利之積官朝散大夫累贈中大夫子伯玉承議郎官至邕州通判仲珪朝奉郎官至漳州通判以父任姪孫堯道登端平二年進士第奉議郎國子監丞

鄭昇字元舉其先常州別駕淑自莆之南湖遷於仙遊以皇祐元年登進士第試秘書省校書郎苦學著文仕宦有能聲終循陽

理掾有寓懷詩集易學釋疑春秋發微藏於家孫可復

可復字彥修兩薦鄉書嘉定七年登進士第調婺州東陽縣尉縣

乃平章喬公行簡之桑梓邦時喬處要路族黨倚勢撓法公屹

然有守喬深器之授訪古書刊載禮修爾雅再調福州教授知

婺州教授

潮陽縣通判循州官至朝奉郎戴禮儉樸嗜書老不釋卷捐金

公性

構書如恐失之晚年家藏幾數千卷手自編錄以韻類之目日

曰百八集書未及竟而卒

郭琪慶歷二年登進士第試秘書省校書郎歷官兵部郎中有國

山溪四

三六

戚曾其姓者奪民田累政不敢決公判歸之民為國戚所陷而死蔡端明以詩哭之有如山判筆心常壯為國忠魂勢莫驚之句復銘其墓姪孫嶢

嶢紹興十二年登進士第初調廣州司州馬上轉戰身歿於陣帥奏於朝官其子一姪孫子力

子力字景行以太學舍選登開禧元年進士第調肇慶府教授時郡守事掎歛公從容以言箴之守感悟且以剡上再調惠州教授校文程江監試欲私其所親以賄囑公正色却之其人啣公

置毒於酒公夜夢神人為滌其腸遂不為害官至漳州通判卒
王臞軒邁銘其墓

陳闡字伯通皇祐元年登進士第歷汀州武平縣令洞獠販鹽挾
刃久為民患公明立斥候訓練丁壯訖公之去境內晏然知廣
德縣縣舊多滯訟公與民面議可否立決辟監州建豐國監時
廖恩嘯聚閩嶺一路騷然安撫司檄公經畫其置水口倉立鎖
港均定八州鹽佑以弭寇攘皆自公發之凡六年歲課增三十
六萬緡未嘗自言通判泉州知建州歲飢境內有競糴者令疑

山溪四

三九

以為盜以狀白於州者數十公曰一日之聚至數百人此何盜而遽如許耶殆不過以饑故爭食爾已而推驗信然遂檄縣杖而釋之促令出粟賑貸眾遂復業知萊州郡人信服相與畫像祠之力求掛冠終於私第官至朝請大夫勲官至柱國賜服至三品子子平朝奉大夫子輝朝請大夫累贈金紫光祿大夫有鹽法議三卷文集數十卷陳覺民狀其行寔序辰銘其墓從子高

高字可中少游湖學補太學生登元符三年進士第召試除太學

錄祭酒龔原司業傅楫薦公潛心經術尤深於易遷博士政和中始建太醫學除太醫學事業時有紫芝對產於北堂之左應制撰雙芝記累上封事以切直忤卿相慨然力請休致卒官至朝奉郎

陳太卞字仲循治平四年登進士第與章惇有舊及惇當國屢招以書竟不往以明堂恩封二親拜且泣曰吾不能與時俯仰題勉仕宦者正為吾親今恩封既及可以休矣遂致事時年五十六友人游酢贈詩其畧曰即今年纔五十餘脫去簪紱弊屣如

山溪四

聖時搜選動空谷策足要路爭先趨廟堂故人握重柄僵者可
植瘦可瘦瘦惓惓風義數寄語掉頭不顧甘如愚見游酢文集官至奉

議郎

洪中元祐六年登進士第除國子司業出知建州中年勇退不嗜

仕進家居幾二十年姪孫天賦

天賦幼敏悟通六經應童子科免文解試禮部不中補入太學寶
慶二年登進士第居官所至以循良稱厯陽江縣令有訟至庭
者不施鞭朴諭以道理皆民胥化知古田連江二縣通判循州一

卒

黃顯字景儒其先唐御史滔季子巨源自莆田遷於仙遊公以登
元祐九年進士第不求榮進余太宰深^補欄前特薦改秩厯提舉
廣南西路學事知儋州四考官至朝請大夫從子沔

沔字朝宗元符三年登進士第徽宗奇其才嘗以江南豪士稱之
擢為御^筆華編修厯江淮福建等路都大提點坑冶使官至朝請
大夫秘書修撰姪孫南一紹興元年登第

洪範字天錫大觀三年登進士第祖忠慶厯初以家貲造風亭沙

溪等橋凡七陳校書高立石紀事蔡端明襄持節本路以勞績
奏勅賜本軍助教蠲其役及公登第人謂造橋之報厯泉州安
溪縣朝散郎致仕子處厚

處原升補太學內舍以父蔭補官調鬱林州推官時欽州守倖詆
訾置獄禁勘連年不決干證凡一百七十餘人公司其獄淑問
明^允克咸得其情盡釋之憲使大喜再任漳浦縣尉孫葉以舍選
登紹定二年進士第

張軹字景載父敬熙寧間應八行科鄉人稱為八行先生公以崇

宣元年鄉貢補太學生政和元年上舍釋褐歷士至福州通判
官至承議郎賜服五品

鄭少連字儀魯少力學能文累舉不第嘉祐二年特奏調南劍州
劍浦主簿歷攝五縣民畏服之調許州判官以老求致仕除大
理寺丞卒有詩學藏於家姪孫列寶慶二年登第終於平江府
教授

朱泳字子游特將制綬之族孫登乾道八年第初調連江尉以捕盜
改秩知海陽縣代者以月解虧減為州家拘留公為交承議誼

出私橐代償公優撫字而拙催科人感公德賦以時輸不勞自
辨尋除福建運營董試漕閩當路囑公私其子公正色拒之去
卒為窘拾終於官所士黨悲慨猶子首諒穎之聯中特科首諒
調龍巖簿汀寇衝突長官巡尉棄縣去大參陳公韓時為本路
招捕使喜公守節悉以令佐職任委公公感知已身率士卒督
戰盡擒賊黨邑賴以全勞績上聞公無意榮進一力丐祠大參
陳公甚義之穎之官至香山以通直郎賜緋致仕